

Powšitkowne WOZJEWJENJA

njedźelu, 30. oktobra 2016

Přiležnosć k swjatej spowědži w Róžeńće

W Róžeńčanskej hnadownej cyrkwi je do Chudych dušow poslednja składnosć k swjatej spowědži pónđzela, 31. oktobra, wot 17 do 18 hodž. Spowědnicy budu fararjo Michał Anders, Měrcin Deleńk, dr. Michael Kleiner a dr. Michael Ulrich.

„Cool kadla – fecich holca“

Dekanatne dušepastyrstwo přeprašuje wšitke džěci, kotrež so na přenje swjate woprawjenje přihotuja, na zhromadny dzeń pod heslom „Cool kadla – fecich holca“ srjedu, 16. nowembra, wot 9 do 15 hodž. do Njebjelčic. Započatk je z Božej mšu w cyrkwi. Zajimcy njech so prošu hač do pónđzele, 7. nowembra, pod telefonowym čisłom (03 57 96) 8 87 07 we Worklecach přizjewja. Za wudawki dnja zběra so wot kóždeho wobdžělnika přinošk, kotryž wučinja štyri eura.

Ekumeniska Boža služba z bamžom w telewiziji

Składnostnje zahajenja reformaciskeho wopominanja 2017 přeprašujetej Lutherowy swětowy zwjazk (LWB) a Bamžowska rada k spěchowanju jednoty křesćanow pónđzela, 31. oktobra, na zhromadnu Božu službu w šwedskim Lundže. Nawjedować budu ju bamž Franciskus, prezident LWB Munib Younan kaž tež generalny sekretar LWB Martin Junge. Telewizijny sćelak Phoenix budže tutu Božu službu wot 14 hodž. live wusyłać. Tež w interneće hodži so wona jako livestream sćěhować. LWB bu 1947 w Lundže založeny.

Młodźinski forum II

Po wuspěšnym a zajimawym młodźinskim forumje w zašłym lěće we Wotrowje přewjedže so nětko druhe koło, a to pjatk, 4. nowembra, wot 19 do 22 hodž. we Worklečanskim Don Boskowym domje. „Tutón raz šće wy prašani – džělamy lětsa skerje metodisce a mamy někotre zajimawostki za was přihotowane, dajće so překwapić. Wy šće prašani! Wjeselimy so na was! To je networking, šćinmy z toho ‚best practice‘ model“, pisaja zarjadowarjo na facebook. Nimo dekanatneho kružka su to PAWK, młodźinske kluby, SATKULARjo, studenća, Č.I.L.A.K.i., widejowy kružk SAEK, rejwanskej skupinje a skawća.

Wustajeńca wo wumělcu w Smječkecach

W Smječkečanskej ewangelskej cyrkwi maja tuchwilu wustajeńcu wo wumělcu Wilhelmje Waltheru. Wón njeje jeničce tworićel znateho Drježdžanskeho Čaha wjerchow, ale tež moler něhdyšeho wołtarneho wobrazu Smječkečanskeje cyrkwyje. We wustajeńcy, kotraž wostanje hač do hód, předstaja so jeho žiwjenje a tworićelske skutkowanie. Cyrkej je wšědnje wotewrjena.

W Drježdžanach budže jeno ekumeniska Boža služba

Planowane serbske kemše njeźelu, 6. nowembra, w Drježdžanskej cyrkwi swjateho Antonija wupadnu. Ekumeniska pobožnosć wotměje so sobotu, 26. nowembra ,w 15 hodź. ze superintendentom Janom Malinkom w cyrkwi swjateho Józefa, Rehefeldska hasa 59/61. Po tym zetkamy so w Šolćic kofejowni. Tam změjemy tež poskitk Smolerjec kniharnje. Drježdžanscy Serbja, jich přiwuzni a přećeljo su wutrobnje přeprašeni.

Marjana Bubnerjec

Pytaja kubłarku

Radworski Katolski serbski džěćacy dom „Alojs Andricki“ pyta wot noweho lěta katolsku serbsku kubłarku. Štóž ma zajim, měł so na nawodnicu Moniku Bukowu, telefonowe čisło (03 59 35) 2 07 17, wobroćić. Wot njeje zhoni nadrobnosće.

Poskitk džěloweho městna

Dom swjateho Jana w Smječkecach pyta za nócnu službu pak chorobnu sotru (Gesundheits- und Krankenpfleger) pak hladarja starych z přidatnym wukubłanjom za hladanje zbrašenych (HPZ) pak hladarja-kublarja zbrašenych (Heilerziehungspfleger) abo z podobnym powołanjom a zwólniwosću, tule kwalifikaciju nachwatać. Džělowy čas je wot wječora 20 hodź. hač do ranja 6 hodź., a to dvě do tři nocy wob tydžeń. Městno ma so wot 1. januara wobsadzić. Swoje pisomne požadanje měli zajimcy hač do 30. nowembra na adresu Dom swjateho Jana, Janska kupjel 1, 01920 Worklecy, pósłać.